

*LE CHAPITRE DE LA VERIFICATION,  
contenant cinquante-deux versets,  
escriit à la Meque.*

*Ekteri intitule ce Chapitre du Jugement, parce  
que ce iour tout sera verifié.*

**A**V nom de Dieu clement & misericordieux. La verifications s'approche, la verification s'approche; Dieu ne t'a pas enseigné en quel temps seroit le iour de la verification, Temod & Aad n'ont pas voulu croire celuy qui leur preschoit ce iour d'affliction & de douleur, mais Temod a esté exterminé par vn bruit extraordinaire, & Aad par vn vent impetueux que Dieu a enuoyé contr'eux l'espace de sept nuits & huit iours consecutifs, ils ont esté renuersez estendus comme des palmiers tombés morts sur la terre; s'est-il sauué quelqu'un d'entr'eux? Pharaon & ceux qui l'ont precedé, & les habitans des villes qui ont esté bouleuersées à cause de leur peché, ont desobeyaux Prophetes & Apostres de Dieu, & en ont esté rudement chastiez. Nous vous auons sauués dans l'arche de Noé lors que les eaux se sont esleuées, pour seruir d'exéple de nostre toute-Puissance à ceux qui l'ont veu & à ceux qui en entendront parler. Souuiens-toy du iour que l'Ange sonnra la

trompette, que la terre s'eleuera, & que les montaignes trembleront, alors ce qui doit arriuer arriuera. Le Ciel s'ouuira de foiblesse, & les Anges qui porteront le trosne de Dieu, seront sur le bord des Cieux. Alors huit Anges presenteront les liures où seront escrits les pechés des hommes, & rien ne sera caché. Ceux qui prendront à la main droite le liure de compte de leurs actions, diront, nous trouuons veritable ce que nous auons crû, nous sçauions de certaine science la venuë de ce iour, & le bonheur de la vie est dans le Paradis : On leur dira, mangés & beués des biens du Paradis à vostre contentement. Ceux qui prendront le liure de compte de leurs actions à la main gauche dirôt. Plût à Dieu que ce liure fut perdu, ie ne sçay quel est ce compte; plût à Dieu que ie fusse eternallement enseuely dedans la terre, les richesses, l'authorité & les tresors du monde me sont inutiles : On dira aux Demons, prenés-les, liés-les, & les precipités dedans l'Enfer, mettés leur aux bras des chaines longues de soixante & dix coudées, & les iettés dedans le feu, ils n'ont pas voulu croire en l'vnité de Dieu tout-Puissant, ils ont mangé le pain des pauures, ils sont aujourd'huy sans protection & sans pain, & ne rencontrent que les peines de l'Enfer preparées pour les meschans. Le iure parce que vous voyés, & parce que vous ne voyés pas que l'Alcoran est la parole du Prophete Apostre de Dieu, ce n'est pas la parole d'un Poëte, mais peu de personnes le veulent croire. Ce n'est pas la parole d'un meschant, mais

peu de personnes s'en souuiennent, il est enuoyé de la part de Dieu Seigneur de l'Vniuers. Les infidelles disent, ô Prophete, si tu parle nous ne t'escouterons pas, ta parole n'entrera pas dans nos cœurs: Dis leur, il n'y a personne entre vous qui vous puisse deliurer de la punition de vos crimes, l'Alcoran enseigne le chemin de salut à ceux qui croient en sa diuine Majesté, ie sçay qu'il y a des menteurs entre vous que Dieu mettra au nombre des infidelles, l'Alcoran est la verité mesme. Loué soit le nom de Dieu tout-Puissant & majestueux.

---

*LE CHAPITRE DE LA MONTE'E,  
contenant quarante-quatre versets,  
escrit à la Meque.*

**A**V nom de Dieu clement & misericordieux. Quelques personnes ont demandé quand sera le iour du Iugement, & en quel temps les meschans seront chastiez; Personne autre que Dieu ne peut deliurer les hommes des tourmens de l'Enfer, il est maistre du chemin qui monte au Ciel, les Anges & les esprits monteront vers luy au iour du Iugement; Ce iour semblera durer aux meschans cinquante mil ans, attens avec patience, les meschans estiment qu'ils sont esloignez de ce iour, mais tu le verras bien-tost, ce iour le Ciel semblera du metal fondu, les monta-